



Vun frieher un heit for Bensmer Leit  
Bergsträßer Anzeigebblatt 3.12.1949



„De Neie“



De „Neie“ isses sälwe beim Woi, woas bei uns Mensche en Lausbuu is. Kaans waaß neemlich, woas noch ausem wärd. Däs lehrt allaans die Zuukunfd. Ausem middelmeefige „Neie“ is schunn en guure „Oalde“ worrn, wie ausem friehere Lausbuu en räschbäkdawe Mann. — Umgekehrt hot schunn en braaver Buu, där wuu in seiner Juugendzeit vun alle Leit geloobt is worrn, schbeerer en groußer Nixnutz un Doagdieb gäwwe, jee noch dem, in was for Hend er geroare woar. „Im Woi leit Woahrheit“ sescht e oald Schbrichwort im Houchdeitsche. Ins Bensmerische iwersetzt haaßt däs: „ärschd wann aaner besoffe is, mäikt mer, woas däs foren Karl is.“ — Es gitt groad sou veel Oarte vun Besoffene als wies Oarte vun Mensche gitt. Nor gäwwe sich die Mensche im Suff nadierlicher als wie im niechderne Zuuschdand. Im Suff veschdellt sich kaaner sou leicht. Im Gäjedaal, er gitt sich sou, wie er waiklich is. Drumm kommer en Mensch ärschd dann richdig taxiern, wammern mool besoffe gesähe hot. Unner „besoffe“ maan ich in dem Fall net „krottevoll“, „schdächgranaadevoll“ un wie sunchd noch die Bensmer Ausdruck haaße, die wuu de häigschde Groad vunde Besoffenheit zum Ausdruck bringe, sonnern nor leicht „ougeheirert“, „beschwibst“ un „besaiselt“. Wär doo lacht un singt, där is vun Naduur aus en guurer Mensch, wär krageelt un schdichelt, vor dem soll mer sich in Oacht nemme, wär awwer goar nix redd un schdill in seiner Eck hockt, däs issen Haamdugger unen gefehrliche Kunne. Er hoischd die annern blous aus un vekaaftse, wie sich die Geläjenheit doodezoo biere dutt. — De Woi kann Foindschaft schdiffde, er kann awweraa oalde Foindschafde iwverbricke un in Froindschafd umwannle. Wann sou äbbes vorkimmt, dann woars guure Woi, wuu de Wärt aam vorgesetzt hot. „Raddegaggel“ schdimmt die Mensche bäisoartig im vefiehartse zum Schdreit. „Wärtshauskrischer“ gitts nor bei schläächdem Woi. Bei guurem Woi singt mer, bei „Raddegaggel“ krehlt mer. Bei gurem Woi maant mer de neegschde Doa, mer hett Fliejel, bei „Raddegaggel“ scheemt mer sich am annern Mojend unner die Leit ze gäih, weilmer glaabt, jeerer kennt aam noch ousähe, in woas fore schläächdi Gesellschaft mer am Oowend vorhär geroare woar. De „Raddegaggel“ is aani devuu. Net umsunschd hot mer inde Schuul geläart: „Soagmer, mit weem de gäischt un ich willder soae wärde bischd.“ Im Woiduusel hot sich schunn mancher net nor de Moage vedorwe, sonnern aa schun es ganze Lääwe vehunzt.

Beim diesjeerige Neie kimmt däs net vor. Den soll mer awweraa net nunnerschdärze, sonnern Schluck for Schluck genieße. Un bei jeerem sollmer zum Himmel nuffgugge un em liewe Gott danke, dass er uns sou äbbes hot woachse losse.

Freilich, wie där noch „Färrerweiße“ woar — Mim „Färrerweiße“ isses soue aijeni Sach. Där hots hoalt uff sich. Där is kaan Lausbuu wie de Neie, däs issen ugeschleffene Wazz. Wär den net kennt, där soll oik vorsichtig mirrem umgäih, orrer, woas noch besser is, ganz vunem wäkbliwe. Awwer um Gottes Wille net zuu veel vun dem Zeik! Es kann joo aa kaaner en Schobbe Rizinuseel vetroae, weilen de Dokder nor en haiwe Subbeleffel devuu veschrewe

hat. Wār beim Färreerweiße net vun sälbschd oab un zuugäwwe kann, där kriecht entweerer sälbschd e Knallaag oirer – soi Oaldi, die wuu ehrn Lumbes net vorsichdig genunk in Empfang genumme hot. In deem Joahr hots wuu aa hiwwe un driwwe Knallaage gäwwe. Däs woar vun wäje dem Laschdeausgleich. Neilich wollt mool en Berliner mit soim Audoo doich Bensem foahrn. Do issem zu soim Uuglick oigefalle, daß unser Gäjend e Woigäjend weer, un doo wollter die Geläjenheit ausnitze un sich mool „richtig die Nase bejießen“. Däs issem aa wäiklich gelunge, mäinder als wie dem lieb woar. Där Mann woar neemlich leirer in die Färreerweißezeit noikumme. Wuuer alles woar, waaß ich net. Ich waaß nor, dass er am Oowend schdächgranaadevoll ende Bach drunne beis Färdige gefunne worrn is. Wieer wirrer zuu sich kumme woar, hot mern gefroagt, woaser eijendlich getrunke hett. Do horrer als vor sich hiegewälscht: „Weiße Feder“, „Straußfeder“. Woahrschoins horrer gemaant, däs weer de Noame vuneme Bensmer Schbitzewoi. Ich bin groad dezuukumme, wieer als wirrer „Weiße Feder“, „Straußfeder“ geschdammelt hot. Wie sich däs kaans erkleern hot kenne, bin ich doich Froage dohinnerkumme. „Där Mann“, häwwich zuude Leit drummerum gesoat, „hot innere Schdraußwärtschaft Färreerweiße gesoffe! Kunschdick, dass er jetzt nimmäh waaß, ober e Mennche orrer Weibche is!“

Awwer ich bin vun moiner Redd ganz oabkumme. Ich wollt joo goar net vum Färreerweiße babble, sonnern nor vum „Neie“. Wammer de richdige Geschmack devuu hoawwe will, muß mer doohie gäh, wuu sich die Oihamische drumm reiße dunnt. Däs häwwich neilich aa gedenkt, un wißter woas? Ich häbbs net bereit. Schunn wie ich noikumme bin, häwwich gewißt: „Doo bische in di richdigi Gesellschaft kumme. Die ganz Schdobb woar schun gerasselt voll. Mer hat gesunge und gelacht, Witz vezählt un vorgetroae un, woas mer besunnerschd gefalle hot, alles hot doichenanner gehockt. Es woarn junge un oalde veträäre, Beamte un Aaweiter, Bauern en Handwäiker, Schdurierte un Netschdurierte, Geschäftsleit, Fawriggande un Daagelehner, korz, wiese groad kumme sinn un Platz gefunne häwwwe, alles doichenannergewärfeld. Und wie e Zeiche vunde Aanigkeit hot vor jeerem es sälwe Gloas geschdanne, net gräißer un net klaaner, net veschiede inde Form un net veschiede inde Fabb, naa, groad aans wies anner. Ja wäiklich, doo hot mer Deitschland im klaane wirrer mol aanig sähe kenne. Ich häbb mer ande Kobb gegreffe un beimer gedenkt: „Kennst's net immer sou bleiwe? Muß bei uns Deitsche immer ärschd en klaane Rausch dezuukumme, daß mer aanig sinn? Kennt mer däs net aa soi, wammer nichdern is? Awwer naa! Do machese sich gäjeseitig es Lääwe schweer, doo fiehrnse Prozässe minanner, bisses letschde Gäärschdel druff gange is, doo hengese sich enanner woas ou, doo schdreirese sich rumm um Sache, die wuu de Sack de Bennel net wärt sinn, do vekalfakdert de aane de annern, Sinn noachtreegich, schoadefrouh, haamduggig, raffgierig un bäisoartig, mit aam Wort — es sinn Mennche. Un woas is die Ursach vum ganze? Weil kaaner dem annern woas gerne dutt, weil schun jeerer glaabt, er keemt ze korz, weils soim Noachber e bissel besser gäh als wie ehm. Ja, ja, es Gäld un die Leit.“

Woas weers sou schäi uff däre Wält,  
Wammer net rächne mißt mim Gäld!  
Woas weer die Wält voll Härrlichkeit,  
Wann druff net wohne deen die Leit!

Drumm häwwich mer mit Vorbedoacht,  
Moi aijeni Wält zeräächd gemoacht:  
Ich peif uffs Gäld un uff die Leit

Un lääb sou in Zefreerenheit.

Woas hälfe aam awwer alle guure Vorsetz? Wammer unner de Welf is, muß mer mirren heile. Mer braucht doodebei joo noch lang net es heilend Eelend ze kriehe, woas bei manche Laadmiedige oft es Enn vum Lied is, wannse ehr Schnuudche zuu dief inde „Neie“ gedunkt häwwwe. Sou Leit sinn wäiklich zu bedauern. Se kumme um däs, woas annern vum „Neie“ profediern, neemlich es Driwwerwäkumme iwwer den klaane Dräk vum aldeegliche Lääwe. Woas hilft all däs Groine, wanns mim Lache bekanntlich veel besser gäiht. — Ich häbb frieher mool inde Hoasegaß e Schbrichelche uff zwaa Fenschderlääre uffmoole lasse. Die Lääre sinn mit de Zeit brichig un doich neie ersetzt worrn. Doodemit is leirer aa däs Schbrichelche veschwunne. Awwer woas ich doomools noigelegt häbb, gilt heit noch. Dasses net ganz vegässe wärd, will ichs an däre Schdell aa for unser Noachkumme iwwerliwwern. Es haäßt:

Die allerbilligst Azenei  
Däs isses Lache. Es macht frei  
Vun allem, woases Härz beschweert,  
Un sunschd noch ande Närke zehrt,

Wär Oowens denkt: „Ehr Soije,  
Loßt mich in Ruh bis moije!“  
Un lacht dezuu, däs is kaa Schoof!  
Däs issen woahre Filessoof!

Woas en Filessoof is? En schdurierte Mann? Däs is aa net immer woahr. En Filessof kann jeerer vun Eich wärrn, wanners nor sou weit bringt, dassers Lääwe sou nemme kann, wies inde Wäiklichkeit is. Mer muß sich hoalt iwwer Sache wäksetze kenne, wuu doch net ze ennern sinn. — Beim „Neie“ wärrn die mäinschde Mensche Filessoofe. Däs häwwich na neilich wirrer feschdschdelle kenne. Freilich woarn des laurer „lachende Filessoofe“. Es girrerer awweraa, die babble kaa Wort un schmunzele nor vor sich hie. Die denke nor ehr Daal. Vun däre Sort woar de Jaggobb aaner. Er hot schdunnelang seelevegniigt inde Wärtschaft hocke kenne, ohne e Wort ze babble.

Wie oft is soiner Fraa dehaam es Oowenässe vebrotzelt. Das horren awwer net aus soiner Ruh gebroacht. Er hot doogehockt un simeliert, manchmool aa e Liedel vor sich hiegepeffe un is ärschd wäkgange, wann de Wirt vor soiner Noas es Licht ausgeblouse hot. Aamool isser aa wirrer mool net haamkumme, wies Zeit woar un soi Fraa horren iwveroall gesucht. Endlich hotsen modderseeleallaans inere klaane Wärtschaft gefunne. „Ei Jaggobb“, hotse gekresche, „Ei Jaggobb, waaschde net, woas sich geheern dutt? Scheemschde dich dann goar net, daß de als letschder doohocke duuschd? Fui Deiwel nochemool!“ Ganz ruhig hot de Jaggobb soiner Fraa zerickgäwwwe: „Ich mich scheeme? Vor weem dann? Ei wie kimmschde mer dann vor? Kann ich dann äbbes dezuu, daß die annern vor meer haamgange sinn?“ — Ja, mim Haamgäh isses iwwerhaapt soue Sach. Aamool will mer un kann net, weil de ganze Disch voll Leit ufschdeije mißt, wannse aam doichlosse wollte, e annermol kennt mer un will net, weil groad e Neiigkeit uffs Dabeet kimmt, wuu mer noch mitouhähjern meeschd. Jeeresmool hot mer for sich sälschd e anneri Ausredd, bis die letschd kimmt: „Jetzt hots sou lang gedauert, jetz konns maandwäje aa noch lenger dauern!“ Schdimmt doo aaner goar noch das oalte Bensmer Lied ou, wumalle guure Vorsetz iwwer de Haufe wärf, dann wärd mitgesunge sou laut wie mer nor kann:

„Mer gäihn net haam,  
Mer bleiwe sitze!  
Mer bleiwe doo,  
Bis daß mer schwitze!  
Mer gäihn net haa-aa-aam,  
Mer bleiwe doo!  
Mer gäihn net haa-aa-aam,  
Mer bleiwe doo!“

